



LEKSYON 10
MGA KATUNG DANAN SA
MGA ANAK

**Matun-an Nimo Niining Leksyona Ang Mosunod
Nga Mga Katungdanan sa mga Anak**

**Pagtahud, Pagpasidungog, ug Pagsugot sa Ilang
mga Ginikanan**

**Tungod kay sugo kini sa Dios
Tungod sa ilang pagkaginikanan
Tugod sa gugma**

**Pagtabang sa Ilang mga Ginikanan
Pagtabang sulod sa balay
Pag-amoma alang sa mga tigulang na mga
ginikanan**

**Gugma, Pagpasidungod ug Pagsugot sa Dios
Pagdawat ni Jesus ingon nga manluluwas
Pag-ampo ngadto sa Dios
Unahon ang Dios**

PAGTAHUD, PAGPASIDUNGOG, UG PAGSUGOT SA ILANG MGA GINIKANAN

Tungod kay sugo kini sa Dios

Usa sa Napulo Ka Mga Sugo nga gisulat sa kamot sa Dios mao ang alang sa mga anak. Mao lamang kini ang kasugoan nga adunay saad nga nag-uban. Nagpaila kini unsa ka kamahinungdanon niini.

Exodus 20:12. Tahuron mo ang imong amahan ug ang imong inahan aron magahataas ang imong mga adlaw sa yuta nga ginahatag kanimo ni Jehova nga imong Dios.

Si Jesus, ang Anak sa Dios nagasubli niining maong sugo. Si Apostol Pablo nagasubli usab niini sa iyang pagpanudlo.

Mateo 15:4. Kay ang Dios nagsugo nga nag-ingon, 'Tumahud ka sa imong amahan ug sa imong inahan.'

Efeso 6:1-3. Kamong mga anak, kinahanglan managsugot kamo sa inyong mga ginikanan diha sa Ginoo, kay buhat kini nga matarung. "Tumahod ka sa imong amahan ug inahan" (Kini mao ang nahaunang sugo nga may saad), "aron magamauswagon ikaw ug mataas ang imong kinabuhi dinhi sa yuta."

Ang mga bata nagapasidungog sa ilang mga ginikanan pinaagi sa ilang pagtahud ug pagsugot kanila. Nakadungog na ba ikaw ug mga bata nga mosumbalik pagtubag sa ilang mga ginikanan? o mosulti sa madi-numtanong butang batok kanila? o modumili sa pagbuhat sa gisulti sa ilang ginikanan ngadto kanila?

Nakakita ka na ba ug mga bata nga nagapatuyang sa pagbuhat nga morag wala lang makadungog sa gipang-sulti sa ilang ginikanan kanila? o mobalus kon kastigohon sila? Matag higayon nga buhaton nila kini ilang gisupak ang usa sa Napulo ka mga Sugo.

Sa panahon sa Daang Tugon ang pagkamasupilon ngadto sa mga ginikanan usa ka dakung sala. Kon ang usa ka batan-ong lalake modumili sa pagsugot sa iyang ginikanan, mahimo nga siya silotan ug kamatayon. Sa ingon niining paagi ang kagamhanan nagabugnaw sa pagdagsang sa mga kadautan, sa mga espiritu nga masupilon nga maoy hulga sa katilingban.

Kon ang tanang mga anak magatahud, magpasidungog ug mosugot sa ilang ginikanan, diotay lamang ang mahimong malapason sa balaod ug kriminal sa dihang modagku na sila. Ang anak nga buot nga ang iyang ginikanan magmalipayon ug magmapagarbohon kaniya, magbantay gayud kon unsay iyang pagabuhaton ug siya mahimong masignugtanon sa balaod. Apan ang mga anak nga dili magtahud sa ilang ginikanan gamay ra ug purohan nga motahud sa uban. Sila kanunay nagahatag ug kagulan sa ilang ginikanan.

Proverbio 10:1. Ang usa ka anak nga manggialamon maoy kalipay sa iyang amahan apan ang usa ka anak nga buang-buang maoy kaguol sa iyang inahan.

Hangtud nga moabut ikaw sa hustong edad sa pagkahamtong, ang imong ginikanan aduna pay katungod sa pagdumala kanimo. Kana nagpasabut nga sila maka-sulti pa kanimo kon unsay buhaton ug magpaabut nga ikaw mosugot kanila. Sa dihang moabut na ikaw sa hustong edad, imo gihapon silang tahuron, pasidunggan ug mangayo kanilag mga tambag.

Ang pulong sa Dios nagaingon nga ang pagkamasinupilon ngadto sa ginikanan usa sa mga kinadak-ang sala nga mahitabo sa katapusang mga adlaw sa dili pa mobalik si Jesus sa kalibutan. Atong mamatud-an

kini sa atong nakita, nga kini nagalabi pa kadautan karon ug kinahanglan magabantay kita batok niining salaa diha sa atong kaugalingong panimalay.

2 Timoteo 3:1, 2. Apan sabta kini, nga unya sa kaulahiing mga adlaw managpangabut ang panahon nga malisud, kay ang mga tawo unya magamahigugmaon man sa ilang kaugalingon, mga hinapi, tigpagawal, hambogiro, tampalasan, masukihon sa mga ginikanan, walay igabalus, dili diosnon.

Buhata Kini

1. Asa sa Napulo ka Sugo nga adunay saad nga nag-uban niini?

.....

2. Sag-uloha ang Efeso 6:1-3.

3. Sa panahon sa Daang Tugon, unsang kastigoha ang ihatag sa kasugoan alang sa usa ka anak nga kanunay modumili sa ilang ginikanan?

.....

4. Unsang klaseha nga lungsoranon ang usa ka masinugtanong bata kon modaku na siya?

.....

Tungod sa ilang pagkaginikanan

Ang Dios nagabutang sa imong kinabuhi ubos sa pagbantay sa imong ginikanan. Daku ang pag-antus sa imong inahan ug nag-atubang siya sa kamatayon sa dihang gihimugso ikaw sa kalibutan. Kasagaran sa mga ginikanan nagalakaw nga walay nahot aron lamang matagbo ang gikinahanglan sa ilang mga anak.

Unsa may imong nutang sa imong ginikanan? Unsaon man nimo pagbayad kanila sa gasa sa kinabuhi nga karon imong natagamtam? o sa tanan nilang buhat sa pagpakaon, pagpabiste ug pag-edukar kanimo? Busa utangan ka sa pagtamud ug pagtahud ngadto kanila. Pasidunggi sila tungod kay sila imong ginikanan. Sunda sila tungod sa ilang pagkaginikanan.

Ang Dios nagpaabut nga ang imong ginikanan magiya ug magbansay kanimo sa tanan nimong hingbaloan. Busa, kon ikaw mobulig kanila nagbulig usab ikaw sa plano sa Dios alang kanimo ug kanila.

Genesis 18:17, 19. Ug si Jehova miingon. . . Kay siya naila ko, aron magasugo siya sa iyang panimalay sa ulahi niya, aron magabantay sila sa dalan ni Jehova, nga sa pagbuhat sa pagkamatarang ug sa katarungan.

Ang imong mga ginikanan nakalatas na sa mga kasinatian nga imong ginalatas karon. Busa nakasabut sila sa imong mga problema nga labaw pa sa imong gihunahuna. Gusto silang motabang kanimo sa tanan nilang mahimo. Pakigsulti kanila ug pangayo sa ilang tambag.

Daghang mga batan-on nga ubos ang ilang pagtan-aw sa ilang ginikanan. Tingali tungod kay ang ilang ginikanan kabus ug dili edukado. Tingali kinaraan ang ilang paagi sa pagbiste ug sinultihan. Tingali tigulang na sila nga makasabut sa mga suliran karon. Apan nagkinahanglan gihapon sila sa pagtahud sa ilang mga anak. Ug kasagaran ang ilang mga tambag labi pakamaayo ug makatabang, kay sa mahibaloan sa ilang mga anak sa mga basahon sa kolegio.

Proverbio 15:5. Ang usa ka buang magatamay sa pagsaway sa iyanag amahan; apan kadtong naga-tagad sa pagbadlong nagapakita sa pagkabuotan.

Buhata Kini

5. Ilista ang mga maayong butang nga nabuhat sa imong ginikanan alang kanimo.

.....

.....

.....

.....

.....

.....


Kon duna ikaw higayon pasalamat sila niining mga butanga.

Tungod sa gugma

Adunay mga bata nga mosugot lang sa ilang mga ginikanan tungod kay mahadlok silang kastigohon kon dili sila mosugot. Usa ka maayong katarungan ngano nga ikaw mosugot kanila tungod kay imo silang gihigugma.

Tungod kay imong gihigugma ang imong ginikanan gustoan nimo nga sila malipay. Imong mahibaloan nga kon unsay ilang isulti nga imong pagabuhaton, alang kini sa imong kaayohan—dili sa paghatag kanimo sa kinabuhing malisud. Imong mahinumduman nga sila adunay kasinatian nga labaw pa sa imong nasinati, ug nga ang ginikanan nasayud kon unsay labing maayo alang sa ilang mga anak.

Kon malisud nimo ang pagkinabuhi sa buluhaton sa usa ka Kristohanon, hunahunaa lamang si Jesus. Bisan tuod nga Siya mao ang Anak sa Dios, Siya nagasunod sa Iyang kalibutanong ginikanan. Motabang Siya kanimo sa paghigugma ug pagsugot sa imong mga ginikanan kon ikaw mangayo Kaniya niini.

 Lukas 2:51. Ug Siya milugsong kuyog kanila sa Nazareth ug siya nagmasinugtanon kanila.

Sa basahon *Making the Home Happy*, si R. T. Cross misulat:

“Adunay duha ka katarungan ngano nga kita mahigugma sa Dios: Una, tungod sa iyang katungdanan nga iyang gihuptan sa tibuok uniberso; ikaduha, tungod sa iyang paghigugma ug mahigugmaong kinaiya.

“Dunay duha ka katarungan ngano nga pasidunggan ta ang mga punoan: Una, tungod sa ilang

gihuptan, ikaduha, tungod sa ilang kinaiya, kon ang ilang kinaiya maayo

“Adunay duha ka mga katarungan ngano nga ang ginikanan pasidunggan: Una, tungod sa ilang katungdanan nga ilang gihuptan ingon nga atong tigpanalipod, magdudumala ug tigtagbo sa atong gikinahanglan; ug ikaduha, tungod sa ilang paghigugma alang kanato, bisan unsay maayo nga anaa nila ug bisan unsay maayo nga ilang gibuhad alang kanato.

“Ang gugma nagalakip sa tanang kaakohan nga atong nautang sa atong mga ginikanan. Dili nato mapasidunggan ang atong ginikanan kon dili nato sila higugmaon, o dili nato sila mahigugma kon dili nato sila mapasidunggan.

Buhata Kini

6. Basaha pag-usab ang talaan sa mga katungdanan sa mga anak nga gihatag sa unang pahina niining leksyona. Ug paglista ug tulo ka mga katarungan ngano nga ato silang tahuron, pasidunggan ug tumanon.

.....

7. Unsa nga panig-ingnan nga gihatag ni Jesus kanato?

.....

8. Dili nato ang atong ginikanan kon dili nato sila, o dili nato sila mahigugma kon dili nato sila

PAGTABANG SA ILANG MGA GINIKANAN

Pagtabang sulod sa balay

Ang mga anak adunay usa ka kaakohan sa pagtabang diha sa panimalay. Samtang ang mga ginikanan gipaabut sa paghatag sa gikinahanglan sa ilang mga anak, ang mga anak usab makatabang sa mga buluhaton sulod sa balay. Gikinahanglan kini nila tungod kay usa kini ka bahin sa ilang pagtuon. Ang usa ka bata nga nagatubo nga walay kaakohan sa mga buluhaton sa panimalay mahimong tapulan ug mahimong malisud kaniya ang pagtrabaho alang sa pagsustento sa iyang kaugalingon sa dihang mohamtong na siya.



Sa panahon nga ang mga batan-on makakaplag ug trabaho ug aduna nay kinitaan, kinahanglang mahimuot silang motabang sa mga galastohon, samtang anaa pa sila magpuyo sa puluy-anan sa iyang mga ginikanan.

Buhata Kini

9. Ngano nga gikinahanglan nga ang mga anak mobuhat man sa mga buluhaton sa panimalay?

.....

Pag-amoma alang sa mga tigulang na nga ginikanan

Kon ang imong ginikanan natigulang na kaayo ug dili na makaatiman sa ilang kaugalingon, imong mapakita ang imong gugma ug pagkamadinawaton sa tanan nilang nabuhat alang kanimo pinaagi sa pag-amoma kanila. Ihatag ngadto sa imong mga tigulang nga ginikanan ang labing maayo.



Hinumdumi ang panig-ingnan nga gihatag ni Jesus, nga Siya bisan himalatyon na diha sa krus, nagahunahuna gihapon sa Iyang inahan ug naghatag Kaniya ngadto sa Iyang mga tinun-an aron sa pag-amoma kaniya.

Proverbio 23:22. Pamati sa imong amahan nga nanganak kanimo ug ayaw pagtamaya ang imong inahan kong siya tigulang na.

Buhata Kini

10. Unsaon man pagpakita sa mga anak ang ilang gugma ug pagkamadinawaton sa ilang mga ginikanan?

.....

.....

PAGHIGUGMA, PAGPASIDUNGOG, UG PAGESUGOT SA DIOS

Pagdawat ni Jesus ingon nga Manluluwas

Ang mga bata kinahanglang makakat-on sa paghigugma, pagpasidungog ug pagsugot sa Dios sa sayong panuigon. Kinahanglang maghinulsul sila sa ilang mga sala ug dawaton si Jesus ingon nga ilang Manluluwas, ug dili maghulat hangtud nga sila mohamtong na.

Ecclesiastes 12:1. Hinumdumi usab ang imong Magbubuhat sa mga adlaw sa imong pagkabatan-on sa dili pa moabut ang dautan nga mga adlaw.

Marcos 10:14. Paduola kanako ang gagmayng kabataan, ug ayaw ninyo sila pagpugngi.

Sa dihang ang bata igo nang makasabut nga siya nakasala, nagkinahanglan siyang maluwas. Kon ang mga dagkung bata aduna nay pagpakita nga sila naghinulsul na, kinahanglan silang bautismohan. Mas maayo alang sa bata ang pagdawat ni Cristo ingon nga Manluluwas samtang sayo pa kay sa kon modaku na siya, malisud alang kaniya ang pagbiya sa iyang kagahapon aron sa pagdawat kang Cristo.

Buhata Kini

11. Unsa ang labing maayong panahon alang sa usa ka tawo sa pagdawat ni Jesus ingon nga iyang Manluluwas?

.....

Ngano?

.....

Pag-ampo ngadto sa Dios



Sa “pag-ampo” nagkahulugan kini sa pagpadayag sa imong gugma ngadto sa Dios. Tingali mapadayag kini pinaagi sa pagsulti ngadto Kaniya sa pag-ampo, pagpasalamat Kaniya, ug pagsulti Kaniya nga Siya imong gihigugma. Tingali pinaagi sa pagdayeg Kaniya sa mga alawiton. Mahimo usab nga kini pinaagi sa pag-adto sa balay sa Dios ug maminaw sa Iyang Pulong o pagtugot Kaniya sa pagsulti kanimo samtang ikaw nagabasa sa Iyang Pulong.

Nagalakip usab ang pag-ampo sa paghatag ngadto sa Dios, tungod sa imong paghigugma Kaniya ug gusto ikawng makig-uban sa Iyang buluhaton. Ingon nga ang uban nagahatag aron ikaw mahibalo mahitungod sa Dios, ikaw usab mohatag sa imong halad aron sa pagsulti sa uban mahitungod Kaniya.

Ang Biblia nagapakita kanato nga gusto sa Dios nga ang mga bata adunay kabahin sa pag-ampo ngadto Kaniya. Kinahanglan silang moapil sa hiniusang pag-ampo sulod sa panimalay. Ug sila mokuyog uban sa ilang ginikanan ngadto sa balay sa Dios.

2 Cronicas 20:13. Ug ang tibuok Judah mitindog atubangan ni Jehova, kauban sa ilang mga gagmayng anak, ilang mga asawa, ug mga kabataan.

Kadaghanan sa mga inilang tawo sa Biblia nakakat-on sa pag-ampo ug pag-alagad sa Dios sa mga bata pa sila. Uban kanila mao si Moises, Daniel, Samuel ug Timoteo.

Ang mga bata miuban sa ilang mga ginikanan aron makakita kang Jesus ug maminaw Kaniya. Didto sa templo ang mga bata nanagsinggit ug mga pagdayeg ngadto kang Jesus. Sa dihang ang mga relehiosong punoan sa templo nangasuko mahitungod niini, si Jesus nangutana kanila:

Mateo 21:16. “Wala ba gayud kamo makabasa gikan sa kasulatan nga nag-ingon, ‘Gikan sa baba sa mga gagmayng bata ug sa mga masoso gihatud mo ang nahingpit nga pagdalayeg?’ ”

Buhata Kini

12. Pagngalan ug upat ka mga inilang tawo sa Biblia nga nakakat-on sa paghigugma ug pag-ampo sa Dios samtang gagmay pa sila.

.....
.....

13. Mahigugma ka bang magawit ug mga pagdayeg ngadto sa Dios?

.....
Unsang bahina sa pagsimba ang imong labing higustohan?
.....

14. Pag-ampo alang sa mga bata nga imong nailhan nga nagkinahanglan sa pagkat-on kon unsaon sa pag-ampo ngadto sa Dios.

Unahon ang Dios

Ang mga bata nga kanunay nilang ipauna ang Dios makatagamtam sa mga panalangin sa Dios sa ilang kinabuhi.

Mateo 6:33. Unaha ang gingharian sa Dios ug ang pagkamatarung ug kining tanang butang igadugang ra kaninyo.

Usahay, ang batan-ong kristohanon nga adunay ginikanan nga wala pa maluwas magaatubang ug daghang mga suliran. Ang Dios nagasulti kanila sa pagtahud ug pagsunod sa ilang ginikanan. Unsa may ilang buhaton kon sultihan sila sa ilang mga ginikanan sa pagbuhat sa dili matarung? Unsa kaha kon ang ginikanan magasulti kanila sa pagpangawat? o mag-ampo sa mga diosdios o larawan? o makig-ambit sa mga malaw-ayng kinaiya? o makigminyos sa usa nga dili Kristohanon.

O, unsa kaha kon ang mga ginikanan maningkamot sa pagkuha sa pagtoo sa ilang mga anak gikan kang Jesus? Moundang ba siya sa pag-ampo ug pagbasa sa Biblia? Mosunod ba siya sa iyang mga ginikanan niining mga butanga?

Si apostol Pedro makausa nagahimo sa pagpili kon kinsay iyang tumanon, ang Dios ba o ang mga relehiyosong punuan sa iyang iglesya. Ang iyang mga pulong nagahatag kanatog sumbanan nga sundon kon adunay pagkasumpaki.

Mga Buhat 5:29. Mosugot kami sa Dios dili sa tawo.

Ang Dios labaw pa sa atong mga ginikanan o si kinsa man. Iyang gihatagan ang atong mga ginikanan sa kaakohan sa pagiya kanato.

Hangtud nga ang pagtudlo nila kanato dili sayop, ang Dios nagapaabut kanato sa pagsugot kanila. Apan, kon sila mosulay sa pagdala kanato ngadto sa sayop, palabihon nato ang Dios ug mosunod Kaniya kay sa atong ginikanan

Adunay mga batan-ong kristohanon nga gihinginlan sa ilang mga panimalay tungod sa ilang pagdawat kang Jesus ingon nga Manluluwas. Ang uban gisilutan sa kamatayon sa ilang kaugalingong ginikanan, apan ang Dios nagadawat kanila ngadto sa walay katapusang puluy-anan.

Kon ang imong ginikanan mosupak sa imong tinuohan, kinahanglan imo silang hatagan sa pagtagad uban sa gugma ug pagtahud ug mag-ampo alang kanila. Ang imong gawi makatabang kanila sa pagdala ngadto kang Cristo. Unaha ang Dios, bisan unsay bili, ug Siya motabang kanimo adlaw-adlaw.

Buhata Kini

15. Kinsay imong sundon kon ang imong mga ginikanan nga wala pa maluwas mosulti kanimo sa pagbuhat nga supak sa Pulong sa Dios?
.....
16. Pag-ampo alang sa mga kabataan nga kristohanon nga aduna pay ginikanan nga wala pa maluwas. Pag-ampo usab alang sa ilang mga ginikanan.
17. Itandi ang imong mga tubag sa mga makita sa katapusan niining leksyon a.
18. Sulati ang imong rekord sa estudyante alang sa leksyon 10.

Mga Tubag sa Leksyon 10

Kon ikaw adunay 10 ngadto sa 11 ka hustong tubag, markahi ang imong grado ug labing maayo; gikan sa 8 ngadto sa 9, maayo; gikan sa 6 ngadto sa 7, kasarangan. Kon mokubos sa 6 ang imong hustong hustong tubag, basa sa pag-usab ang leksyon.

1. Tahura ang imong amahan ug ang imong inahan.
3. Mahimong silotan sa kamatayon.
4. Mahimo siyang maayo ug masunoron sa balaod nga lungsoranon
6. Tungod kay gisugo kini sa Dios, tungod sa ilang pagkaginikanan, ug tungod sa gugma.
7. Misugot Siya sa Iyang yutan-ong ginikanan.
8. Mapasidunggan, higugmaon, mapasidunggan.
9. Tungod kay bahin kini sa ilang pagtuon.
10. Pinaagi sa pag-amoma kanila
11. Sa bata pa siya. Sa dihang modaku na siya, malisud kaniya ang pagdawat kang Kristo.
12. Moises, Daniel, Samuel, Timoteo.
15. Ang Dios.

Pila ang imong hustong tubag?

Grado